



mjesečni Bilten

omladinska mreža bosne i hercegovine

januar
siječanj
2019.

236

Dragi prijatelji/ce,

Predstavljamo vam **januarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u januaru 2019.....	2
Planovi za februar 2019.	6
Mladi pišu.....	7
Aktivnosti članova mreže.....	9
Saopštenja/informacije/donatori/pozivi	16

Uživajte u čitanju!

AKTIVNOSTI ORC/HCA U JANUARU 2018.

Regionalni task force sastanak



U Sarajevu je 31. januara 2019. godine održan Regionalni Task Force sastanak, u okviru programa Međunarodnog republikanskog instituta Zapadni Balkan, na temu Razumijevanja i prevencija anti-zapadnog i ekstremnog uticaja.

Učešće ispred Omladinskog resursnog centra Tuzla uzeo je Slobodan Blagovčanin kao panelist.

Već dvije godine Institut implementira regionalni program koji se fokusira na borbu protiv nasilnog ekstremizma i malignog stranog uticaja.

U okviru spomenutog programa, IRI je formirao Task Force grupu koji okuplja 18

članova (parlamentaraca, predstavnika civilnog društva, akademske zajednice i medija) iz Bosne i Hercegovine, Crne Gore, Srbije i Makedonije s ciljem informisanja i razmjene iskustava u pogledu borbe protiv nasilnog ekstremizma i stranog uticaja na Zapadnom Balkanu. Regionalni sastanci grupe kao što je bio ovaj se održavaju svaka dva do tri mjeseca i zatvorena su za javnost

Savjetodavni sastanak za manifestaciju „Izbor sportiste Grada Tuzla“

25. januara je, u Prostoru za mlade, na poziv Vijeća mladih Grada Tuzla, održan savjetodavni sastanak na kojem su pored domaćina prisustvovali predstavnici Sportskog saveza Grada Tuzla, Fakulteta za tjelesni odgoj i sport Univerziteta u Tuzli, Komisije za kulturu, sport i mlade GV Tuzla, sportskih klubova sa područja Grada Tuzla, nevladinih organizacija, kao i istaknuti sportski radnici. Na sastanku je razgovarano o položaju mladih i sporta u Gradu Tuzla sa posebnim naglaskom na rješavanju spornih odredbi vezanih za manifestaciju Izbor sportiste Grada Tuzla. Sastanak je protekao u odličnoj atmosferi i konstruktivnoj razmjeni mišljenja, a razgovori će biti nastavljeni i u narednom periodu.

Svi predstavnici sportskih klubova su iznijeli svoju problematiku. Karate klubovi 2020. godine ulaze u članstvo Olimpijskih igara, ali nemaju saglasnost Komiteta. Oni se nadaju da će na taj problem riješiti na Skupštini i ubrzati taj proces do Olimpijade. Karate klubovi su iznijeli svoje nezadovoljstvo zbog bodovanja, iako su bile osvojene medalje 2015. godine na Svjetskom



olimpijskom takmičenju. O bodovanju će biti obaviješten Upravni odbor, koji će taj problem riješiti na Skupštini. Svoju problematiku su iznijeli i biciklisti koji se čitavu godinu pripremaju, bez obzira na vremenske uslove, ali nikad nisu uvršteni ni u jednu kategoriju za dodjelu priznanja. Predsjednica Sportskog saveza Grada Tuzla je predložila da svi članovi imaju zajednički interes, pojačaju finansije za sport, i odabere prioritete za finansije sporta u Gradu Tuzla. Njeno najveće nezadovoljstvo je bilo nepoznavanje mladih sportista o Pravilniku kodeksa oblačenja za „Izbor sportiste godine“. Napisala je i potpisala Pravilnik o kodeksu oblačenja i ponašanja. Svi članovi za „Izbor sportiste godine“ ga moraju poštovati. Također je izrazila nezadovoljstvo da sportski klubovi moraju svoje probleme međusobno riješiti, a ne javno po portalima. Članovi sportskih društava se svi zajedno moraju boriti za sve klubove i da Bosna i Hercegovina mora imati prvaka kao nekad .

Na sastanku je prisustvovala članica Omladinskog resursnog centra Tuzla Nerma Ibrahimović.

Građani protiv terorizma - CAT

Tokom mjeseca januara nastavili smo sa našim redovnim aktivnostima u sklopu projekta „Građani protiv terorizma – CAT“. Naše mačke su nastavile da oduševljavaju javnost na društvenim mrežama, a ovog mjeseca za sve naše pratiocce priredili smo novu nagradnu igru.

Ukoliko još uvijek ne pratite naše mačke – pozivamo vas da to učinite na:

www.facebook.com/CATBiH



Omladinska grupa ORC Tuzla

Radionica iz oblasti medijske i informacijske pismenosti za lokalne NVO

Fondacija "Mediacentar" organizovala je jednodnevnu radionicu u Tuzli, 10.01.2019. godine, za lokalne NVO.

Radionica je bila kombinovana prezentacijama i interaktivnim radom s učesnicima/ama, a vodili su je medijski eksperti iz BiH: profesorica Zarfa Hrnjić Kuduzović sa Filozofskog fakulteta Univerziteta u Tuzli i docent Vuk Vučetić, Filozofski fakultet Univerziteta u Istočnom Sarajevu.

Poziv za radionice bio je otvoren za sve nevladine organizacije koje imaju iskustva u sljedećim oblastima:

- Zaštita i promocija ljudskih prava, posebno prava manjinskih/ranjivih grupa
- Zaštita i promocija slobode govora, medijskih sloboda
- Rad sa mladima, omladinske organizacije

Na radionici je ispred Omladinskog resursnog centra Tuzla učestvovao Benjamin Burek



Burch: Start Me Up

Od 18. do 20. januara 2019. godine održano je Start Me Up: High School takmičenje na Internacionalnom Burch Univerzitetu u Sarajevu. Ovo takmičenje je imalo za cilj prikupiti što više mladih ljudi, punih želje, zajedno sa svojim biznis idejama. Tako je na takmičenju učestvovalo 110 učesnika sa 40 ideja. Također, učešće je uzeo i naš član OG ORC-a, Kenan Suljić, koji je kao nositelj i tvorac ideje zajedno sa kolegama iz ekipe osvojio prvo mjesto sa Start up idejom „DepresijApp“.

Bitno je za istaći da je stvorena ekipa od članova koji dolaze iz četiri različita grada iz Bosne i Hercegovine. Cilj pobjedničke ideje jeste stvaranje jedinstvene aplikacije za depresiju, koja će biti besplatna i u službi i nadležnosti domova zdravlja s kojima se uspostavi saradnja i partnerstvo. Tako je početna saradnja stvorena sa Domom zdravlja Tuzla, Domom zdravlja Srebrenik, kao i UKC Tuzla.

Poseban naglasak je to da će ovo biti prva svjetska aplikacija u ovom formatu, koja će na jednostavan način pružiti podršku, pomoć i edukaciju svim građanima kojima je potrebno.



UMiD! 14



Od 24. do 26. januara 2019. godine održan je prvi (I) modul UmiD obuke, gdje je učešće također uzeo naš član OG ORC-a Kenan Suljić.

UmiD podrazumijeva certificiranu obuku omladinskih lidera/ki „Uči, misli i djeluj!“, koja polaznicima/ama, između ostalog, nudi mogućnost da steknu samopouzdanje, sagledaju svoje sposobnosti i potencijale da razviju osjećaj za odgovornost u društvu i steknu vještine upravljanja i bavljenja biznisom. Na prvom modulu, polaznici obuke su imali priliku naučiti i proučiti o osnovama lidera i liderstva, kao i stvaranje i razvijanje tima i timskog duha.

Radionice je vodila trenerica, Katarina Vučković, a cjelokupan ovogodišnji projekat obuke UmiD 14 se sprovodi pod koordinatorskom palicom Aldina Alića. Učesnici su boravili u „Spajalici“ tj. obrazovno-raznodnom centru za mlade na Ilidži.

Red Bull Future/IO Sesija Tuzla

Red Bull Future/IO Sesija Tuzla održana je 10. januara u CineStar Cinema Tuzla u Bingo City Centru, na kojoj su učešće uzeli naši članovi OG ORC-a Eldin Subašić i Emir Mujakić.

Kako ćemo pozivati leteći taxi, kako će izgledati mobilni telefoni za 20 godina, samo su neka od pitanja postavljena u četvrtak na tuzlanskoj info sesiji održanoj u Cinestar Cinema, gdje su u okviru Red Bull Futur/IO, projekta koji kreativne umove iz cijelog svijeta poziva da kroz video klipove u trajanju od 60 sekundi podijele svoje vizije budućnosti 2030. godine.




Govornici na tuzlanskoj sesiji “dcdc76”, Demir Selmanović i Mario Ilić podijelili su svoje vizije budućnosti s mladima.

Između ostalog, govorili su o tome šta je predviđanje budućnosti, kako oni vide idealnu budućnost, kako tehnologija može doprinijeti predviđanju budućnosti.

Gosti tuzlanske info sesije bili su i učenici Srednje elektrotehničke škole, koji su pokazali svoje ideje i izume.

Jedna od njih je “narukvica za sprečavanje nasilja” koja pritiskom na 3D printano dugme šalje poruku, odnosno poziv u pomoć prethodno određenom mobilnom telefonu. Također, i njihova ideja vreća za spavanje koja toplotnu energiju čovjeka pretvara o električnu, a s kojom su, kako su rekli, željeli pomoći migrantima u BiH da “bar napune mobitele”.



Autori najboljih globalnih vizija bit će pozvani na trodnevnu edukacijsku Akademiju, koja će biti održana u martu 2019. godine u Lisabonu (Portugal), gdje će u jedinstvenom okruženju biti dio inspirativnih radionica i diskusija.

Također, učesnici će imati mogućnost da dalje razviju i usavrše svoje koncepte uz ključne voditelje mišljenja u ovoj zajednici, te se tako izbore za šansu da ih Red Bull Media House pretoči u profesionalnu produkciju.

REDOVNE AKTIVNOSTI ORC I HCA TUZLA

Tokom januara radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA FEBRUAR 2019.

- Nastavak implementacije projekta „CAT 18“. U okviru ovog projekta u naredom periodu naše aktivnosti su nastavak online treninga i mentorstva, te radovi na vizuelnom dizajnu stranica.
- Aktivnosti omladinske grupe ORC-a Tuzla
- Pripreme za početak aktivnosti ALF BH mreže (2019. – 2020)
- Nastavak apliciranja za projekte i učešće u partnerskim projektima u regiji



MLADI PIŠU:



Autor: Slobodan Blagovčanin
#Frontal Blog Challenge

Da li BiH sad treba NATO?

Ulazak Bosne i Hercegovine u NATO, kao građani Bosne i Hercegovine, moramo dvostruko posmatrati. Sve vrijeme imati na umu da u našem postkonfliktnom društvu, duboko pocijepanom u pogledu budućnosti Bosne i Hercegovine – naši politički lideri nisu u stanju da se dogovore i za manje bitne integracije.

Sa jedne strane želimo vojnu neutralnost po ugledu na Austriju i Švajcarsku, dok s druge strane želimo što prije da postanemo dio Evroatlantske vojne alijanse. Ko je u pravu i šta nam donosi progres?

Nebojša Radmanović, iz stranke trenutno predsjedavajućeg u predsjedništvu, gospodina Milorada Dodika, još 2009. godine potpisao odluku o MAP-u, i na taj način naveo da je krucijalno važno za BiH da postane članica NATO saveza. Ova odluka nas danas u mnogome buni.

Kako to da 2009. godine NATO je bio opcija, a sada 10 godina kasnije nije opcija. Mada po meni, još je bolje pitanje kako to da je vrhu vojne alijanse trebalo 9 godina da aktivira gorepomenuti MAP.

Kao jedna od učesnica u sukobima u Bosni i Hercegovini, odlično su poznavali geopolitičku strukturu stanovništva i vlasti. Ako je postojao interes za BiH još 2009. zašto nije dopušteno ili ubrzano učlanjenje? Naš vojni „kontigentčić“ sve i da čitav pošaljemo, ništa ne mjenja u vojnom odnosu snaga.

Danas, 24 godine poslije sukoba u Bosni i Hercegovini sve su vidljivije manjkavosti Dejtonskog sporazuma. Njime se služimo kao „Švedskim stolom“ – u prevedenom, svako uzima sebi ono što mu odgovara. Tako je danas itekako vidljiva polarizacija oko toga šta je Dejtonski mirovni sporazum.

Ako na njega gledamo kao na akt koji je zaustavio rat i osnovu za dalju izgradnju zajedničkog suživota – onda svakako da ne bismo trebali imati problema sa članstvom u nekoj vojnoj alijansi. Ali ako pak, Dejtonski mirovni sporazum tumačimo kao akt koji je zaustavio rat i postao osnova daljem cijepanju država bivše Jugoslavije – onda ne postoji nijedan razlog da se postane članicom NATO saveza.

Marketinški nam se utkalo u podsvijest da članstvo u NATO savezu donosi mir i stabilnost. Ovo je

zasigurno istina, kada je riječ o državama koje strahuju od spoljnih neprijatelja. Ali na koji način bi se odsustvo rata (ne usuđujem se stanje u BiH nazvati mirom) ustabililo, ako bismo postali članicom NATO saveza?



Sve i da su svi 2009. godine afirmativno gledali na članstvo, danas 10 godina nakon toga (čijom greškom, nisam siguran) iz medija možemo saznati da se ponovo aktivirala grupacija stanovnika u BiH, koja se protivi takvoj odluci.

Šta ako bismo imali na umu da Bosna i Hercegovina, da bi zadržala mir i stabilnost treba ostati neutralna? Šta ako bismo shvatili da neki građani nisu za članstvo u Evro-atlantskoj alijansi? Šta ako bismo shvatili da u našoj državi imamo mnogo problema, koje samo unutrašnji dijalog, bez pritiska sa strane može riješiti?

Šta ako bismo zamolili NATO da nas pusti da riješimo egzistencijalne probleme, da se okrenemo sami sebi, da se dogovorimo kakvu želimo Bosnu i Hercegovinu i da li je uopšte želimo? Pa onda ćemo razgovarati o našoj vojnoj neutralnosti ili članstvu. Na kraju krajeva pa mi imamo svega 10 000 vojnika, zašto smo bitni?

A ja? Ja sam za mir, stabilnost i kontinuirani napredak BiH, nezavisno od vojne alijanse ili vojne neutralnosti. Mada, ko mene šta pita.

Autor: Slobodan Blagovčanin
#FrontalBlogChallenge

AKTIVNOSTI ČLANICA OMLADINSKE MREŽE BiH



Asocijacija srednjoškolaca u Bosni i Hercegovini”

Ul. Mula Mustafe Bašeskije 7, 71000 Sarajevo

Tel/fax: +387 33 205 850

E-mail: asubih@yahoo.com

Web: www.asubih.ba

Na pravi način smo započeli novu godinu! Januar je bio ispunjen mnogim aktivnostima lokalnih timova i nekim novostima koje smo spremni podijeliti sa svima.

„ZOA“ – Zimski omladinski aktivizam

Srednjoškolski kamp „ZOA“ se održavao u periodu od 10.-14.01. u Brezi, u organizaciji lokalnog tima Breza, Asocijacije srednjoškolaca u Bosni i Hercegovini.

Kamp je okupio 23 učesnika iz raznih gradova kao što su: Živinice, Donji Vakuf, Visoko, Bihać, Velika Kladuša, Brčko, Bugojno i Kreševo, a koji su imali priliku naučiti nešto novo, družiti se, ali i uživati u ljepotama planinarskog doma „Budoželje“ u Brezi.

Cilj kampa bio je zблиžavanje mladih ljudi i promovisanje omladinskog aktivizma, što je i sami cilj AsuBiH-a. U toku kampa učesnici su prošli razne radionice koje su se doticale tema kao što su: Socijalni dan, omladinska politika, politički aktivizam, lobiranje, kao i politička pismenost mladih ljudi.

Nakon radionica, učesnici su zajedno sa trenerima imali neformalni dio kampa, koji je bio ispunjen raznim teambuilding igricama i igricama upoznavanja.

Treneri na kampu bila su 2 člana Upravnog odbora, Arslan Arnautović i Bilal Softić, zajedno sa predsjednicom organizacije Mateom Brkić.



„Mislim da mi je ovaj kamp pružio priliku da prenesem znanje koje sam prikupio tokom 4 godine rada u organizaciji na ljude koji su novi u ovom svijetu i koji trebaju da nastave graditi našu organizaciju“, rekao je Arslan Arnautović, član Upravnog odbora i trener na ovom kampu.

„Ovom prilikom želimo se zahvaliti svim kompanijama koje su pomogle pri finansiranju ovog projekta, a to su: Općina Breza, Podravka, Perutnina Ptuj, Sarajevo Osiguranje, Mesara “Kristić”, Mesara „Hodžić“, Caffe bar “Adalya”, Caffe “Željo”, Caffe “Mimoza”, Nahonal Gas, KOKA BH, Knjižara “Safir”, Knjižara “Ninac”, Pekara “Palma”, Prodavnica “Nuhanović” i Frizerski salon “Naida”. “ZOA” kamp je uspješno realizovan, te nam je dao motivaciju da isti napravimo i u ljetnom periodu“, kazala je koordinatorica kampa Arabella Lakić.

ASU BiH otvara poziv za finansiranje projekata iz Fonda Socijalnog dana 2018. dan volontera

Asocijacija srednjoškolaca u Bosni i Hercegovini raspisuje konkurs za dostavljanje projektnih prijedloga srednjoškolaca u sklopu projekta “Socijalni dan 2018”. Nakon što je ASuBiH 19. oktobra 2018. godine realizovao svoj treći po redu “Socijalni dan”, projekat u kojem je 1565 srednjoškolaca jedan dan provelo volontirajući u firmama, otvoren je Fond Socijalnog dana za podršku projektnih ideja srednjoškolaca širom Bosne i Hercegovine.

Svaki poslodavac koji je bio partner na ovom projektu te pružio priliku srednjoškolicima da jedan dan provedu u preduzećima i kompanijama, dužan je bio uplatiti iznos dnevnice. Novac kojeg su srednjoškolci zaradili taj dan, oformio je Fond Socijalnog dana 2018. Iz tog Fonda će se finansirati projekti koji su usmjereni ka srednjoškolicima, te koji će doprinjeti razvoju lokalnih zajednica i razvoju mladih u sklopu te zajednice.

Prije popunjavanja Prijavnice za fond Socijalnog dana obratite pažnju na neke od osnovnih kriterija po kojima će komisija, zadužena za odabir i podršku projekata, (koju čini 6 srednjoškolaca iz Bosne i Hercegovine, od kojih 3 člana Upravnog odbora, 1 član Grupe volontera ASuBiH-a i 2 srednjoškolca koji su aktivno radili na projektu Socijalnog dana), vršiti odabir projektnih prijedloga.

Odgovorna osoba (koordinator/ica) mora biti srednjoškolac (14-19).

Budžet projektnog prijedloga ne može iznositi više od 900KM.

(Na osnovu ukupne sume budžeta je potrebno uračunati i 10% poreza koji je obavezan pri uplati sredstava na račun korisnika Fonda).

Budžet projektnog prijedloga ne može sadržavati kupovinu računara, sportske opreme, projektora, niti bilo koje druge opreme koja ostaje u trajnom vlasništvu.

Sve aktivnosti planirane ovim projektnim prijedlogom moraju biti na volonterskoj bazi.

Poziv se odnosi na cijelu Bosnu i Hercegovinu.

Ispred jednog lokalnog tima moguće je maksimalno aplicirati sa 2 projektna prijedloga.

U jednoj lokalnoj zajednici finansijsku podršku može dobiti samo jedan projektni prijedlog.

Trajanje projekta ne može biti duže od šest mjeseci.

Prijedlog projekta mora biti napisan na najviše 7 (sedam) stranica (uključujući budžet i plan aktivnosti) u fontu Times New Roman, veličina fonta 12.

Ciljevi projekta moraju biti jasno definisani, a aktivnosti u skladu sa budžetom.

Projekat doprinosi širenju aktivizma u Bosni i Hercegovini kao i umrežavanju srednjoškolaca u Bosni i Hercegovini.

Projekat se kroz kreativan i inovativan način bavi rješavanjem aktuelnih problema srednjoškolaca.

Primarna ciljna skupina projekta moraju biti srednjoškolci.

Projekat je dostavljen u prijavnoj formi Fonda Socijalnog dana.

Projekat mora biti dio minimalno jedne tematske cjeline:

Društveni angažman u zajednici,
Edukacija srednjoškolaca,
Kulturne i sportske aktivnosti,
Rad sa srednjim školama u zajednici.

Aplikaciju za prijavu projektnih ideja možete pronaći na sljedećem linku: [Prijavnica-za-Fond-Socijalnog_dana-2018](#)

Prednost za dobijanje sredstava imaju članovi ASuBiH-a i Lokalni timovi koji su učestvovali u Socijalnom danu. Ukoliko imaš nedoumice oko toga da li tvoj projekat ispunjava kriterije Fonda kontaktiraj nas na mail asubih@yahoo.com.

Prijedlozi se šalju u elektronskoj formi na mail konkurs@asubih.ba

Svi projektni prijedlozi se moraju dostaviti najkasnije 20.februara 2019.godine u 23:59h.

Projekat mora biti završen do 31.09.2019. godine, u što je uključeno i dostavljanje finansijskog i narativnog izvještaja.

Van Okvira 2



Lokalni tim Šamac, u saradnji sa lokalnim timom Visoko, uspješno je realizovao projekat "Van Okvira 2", koji se održao u Visokom od 14.1. do 18.1.2019. godine.

Ciljevi ovog projekta su već određeni godinu dana ranije, kada su u Šamcu realizovali prvi dio ovog projekta. Učesnici prvog dijela projekta bili su članovi lokalnog tima Goražde, te predstavnici Unije srednjoškolaca/ki Srbije, naše partnerske organizacije. Projekat se bazirao na rješavanju problema koji se prožimaju među srednjoškolcima, a o kojima se ne razgovara mnogo.

"Također, jedan od ciljeva bio je umrežavanje našeg tima u organizaciju jer smo tada, kao poprilično mlad tim, bili nedovoljno upućeni u rad organizacije. Nakon prvog dijela ove priče, zaista smo spoznali, kao tim, vrijednosti koje ova organizacija pruža, međusobno smo se bolje upoznali te dobili motivaciju da radimo idalje ka ostvarivanju misije i vizije ASuBiH-a", rekao je Stevan Josipović, koordinator lokalnog tima Šamac.

Tokom petodnevnog druženja u Visokom, zajedno su radili na problemima homofobije u društvu, seksualnom odgoju i obrazovanju srednjoškolaca, te su razgovarali o aktuelnim problemima ta dva lokalna tima. Treneri su bili dva člana Upravnog odbora Ema Tutić i Arslan Arnatović, te koordinator lokalnog tima Šamac, Stevan Josipović.

"Putovanje u Visoko mi je pomoglo da se oslobodim straha koji sam imala, a odnosio se na vođenje monologa pred većim brojem ljudi. Zahvalna sam na prilici koju sam dobila, upoznala sam odlične ljude te sam imala priliku i da vodim radioncu po prvi put. Zaista mi sve ovo znači i dobila sam želju da pokažem svakom srednjoškolu šta ASuBiH može sve da pruži."- rekla je Kristina Ignjatović, članica lokalnog tima Šamac.

Svi prisutni su se složili u jednom: "Visoko će nam ostati u sjećanju jer ovakav projekat pruža priliku da iskažemo ono što mislimo te da se spojimo sa ljudima sličnih mišljenja i stavova. Odlučno ćemo nastaviti graditi naše timove i vjerujemo da je ovo bila još jedna odskočna daska za LT Šamac i LT Visoko!"



Udruženje građana "C.E.Z.A.R" Srbac

Zdravka Čelara 29, 78420 Srbac

Tel: 051 928 126

e-mail: zdravosrbac@yahoo.com

Udruženje građana „C.E.Z.A.R“ održalo Zimski turnir u stolnom tenisu



Udruženje građana "C.E.Z.A.R." iz Srpa organizovalo je u petak 25. januara prvi zimski turnir u stonom tenisu na kojem je učestvovalo 29 takmičara podijeljenih u tri starosne kategorije – kadeti, juniori i odrasli.

U izuzetno jakoj konkurenciji pobjednici su bili: Andrej Cvijetić (kadeti), Radiša Vujić (juniori) i Milovan Kusić (odrasli). Za prva tri mjesta obezbjeđene su diplome, a najbolji su dobili i pehare. Ovo je bilo drugo po redu druženje srbačkih rekreativaca, nakon veoma uspješnog ljetnog turnira koji je održan u avgustu prošle godine.

Ideja je proistekla iz projekta "Aktivno ljeto", koga su ljetos finansijski podržale Fondacija Mozaik i Opština Srbač, a zbog velike zainteresovanosti turnir je organizovan i ovaj put, i to vlastitim sredstvima udruženja, te uz pomoć firme Mane komerc u obliku osvježenja za takmičare. Plan je da turnir pređe u tradiciju, te da se svake godine organizuju zimska i ljetna nadmetanja u stonom tenisu.





OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitac je u januaru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Mlađi učesnici su kreirali edukativne stvari uz pomoć lokalnih i međunarodnih volontera: duge sa oblakom snijega, dekorativne pahuljice od papira, na engleskom su usvajali novi vokabular na temu emocije (sretan, tužan, ljut). Na muzičkim radionicama su vježbali pjesme „Jingle bells“ i „Djeda Mraze, Djeda Mraze, ne skreći sa staze“, te su imali priliku da se okušaju na raznim udaraljka i akustičnim instrumentima. Ovaj mjesec su najmlađi drugari imali priliku da se upoznaju sa stripovima, što je za većinu učesnika bilo prvi put. Takođe su radili geometriju i osnovne geometrijske oblike.



Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, stickeri, radni listovi plastelin, vuna. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.



Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljkom je kreativno izražavanje na kojima su učesnici i ovaj mjesec pravili kreacije (razne postere i kolaže sa porukama mira, tolerancije i ljudskih prava). Kao i jutarnja grupa i ovi učesnici su pravili

edukativne i maštovite dekoracije na temu zima i zimske radosti. Utorkom su učesnici vježbali engleski jezik i svakodnevnu komunikaciju, spajanje rečenica pomoću određenih elemenata, u vidu takmičarskih igara, te igre prijateljstva, koje poboljšavaju učenje engleskog u grupi i timski rad. Pored ovih aktivnosti, učesnici su i ovog mjeseca na muzičkim radionicama radili sa akustičnim muzičkim instrumentima, te su vježbali različite ritmove. Srijedom su održane radionice turskog jezika sa ponavljanjem osnova za upoznavanje; učesnici su takođe imali priliku da se upoznaju sa kompleksnošću porodičnog stabla u Turskoj. Četvrtkom su se družili uz sportske aktivnosti društvene i teambuilding igre, a petkom su nastavili raditi na radionicama njemačkog jezika (vokabular na temu tolerancija i ljudska prava). Ovaj mjesec su učesnici sudjelovali u debatama na temu ljudska prava, oostati ili otići iz BiH, te na temu volontiranje u lokalnoj zajednici ili izvan BiH. Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje. Koordinator radionica u januaru je bio Adin Midžić uz asistenciju lokalnih, Weltwärts i Erasmus+ međunarodnih volontera. Sve aktivnosti se održavaju u Omladinskom centru Brčko distrikta.

Radionica gitare

Učesnici radionice gitare nastavili su sa redovnim aktivnostima uvježbavajući nove tehnike, etide, kompozicije i duete.

Radionica sambe

Učesnici ove radionice su radili na dvije nove kompozicije. Prvu kompoziciju karakteriše sporiji tempo (radni naslov SOEW), a druga je u Db duru nešto bržeg tempa (radni naslov Snow).

Za februar se planira nastavak svih redovnih radionica Omladinske organizacije Svitac.





H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Doboj
Tel./fax: +387 53 226 886
E-mail: merhamet.doboj@cutuk.net
FB: www.facebook.com/Merhamet-Doboj

Osim stalnih aktivnosti koje podrazumjevaju: Evidentiranje članarine, štampanje korisnicima molbi, žalbi, raznih dopisa, fotokopiranja, rada sa članovima, pružanja informacija, raspodjele humanitarne pomoći, izrada projekata i prisustvo seminarima, okruglim stolovima i drugim sesijama, Merhamet Doboj je tokom januara radio na sljedećem:

15.01.2019 Izvršili smo raspodjelu "Madi" proizvoda. 250 porodica je obradovano sa raznim proizvodima. Zahvaljujemo se donatoru i svim akterima ovog humanog čina.



25.01.2019 U Doboju je u organizaciji Udruženja građana "Vive Žene" Tuzla održan treći i završni trening u okviru seminara „Izgradnja mira i promocija socijalne kohezije“, na kojem je prisustvovala predsjednica "Merhamet-a" Doboj. Trening je namijenjen ženskim organizacijama civilnog društva i neformalnim grupama žena sa područja grada Doboja i općina Doboj Istok, Tešanj i Usora, a u sklopu projekta „Dijalog za budućnost“ koji implementiraju UNDP, UNICEF i UNESCO u partnerstvu sa Predsjedništvom Bosne i Hercegovine.



Učesnici treninga diskutovali su o temama poput nenasilnog prevazilaženja sukoba, razvoju saradnje, timskog rada i socijalne kohezije, participaciji žena, ali i o stresu i prevenciji sagorijevanja. Po okončanju treninga, učesnici su izvršili evaluaciju cjelokupnog seminara, gdje su naveli da je seminar odlično organizovan, te da su obrađene teme od izuzetne koristi. Istakli su stručnost i profesionalnost voditeljica seminara, te iskazali svoju zahvalnost ali i želju i interes da se ovakvi i slični seminari održavaju i u budućnosti.



INFORMACIJE / DONATORI / POZIVI

REKOM Konkurs za podršku projekata OCD

Centar za građansko obrazovanje (CGO), u ime projektnih partnera, u okviru projekta **Aktivizam civilnog sektora za pomirenje u regionu bivše Jugoslavije – podrška REKOM-u**, objavljuje

KONKURS ZA PODRŠKU PROJEKATA ORGANIZACIJA CIVILNOG DRUŠTVA U CRNOJ GORI, SRBIJI, BOSNI I HERCEGOVINI, MAKEDONIJI, KOSOVU, SLOVENIJI I HRVATSKOJ

Možete predati svoje prijedloge projekata, koji treba da doprinesu jačanju perspektiva za pomirenje u regionu kroz utvrđivanje činjenica o ratnim zločinima, uključivanje civilnog društva i šire javnosti u napore usmjerene ka pomirenju i pamćenju, kao i podršci Inicijativi za REKOM. Vaše prijedloge morate dostaviti na engleskom ili lokalnom jeziku, do **1. marta 2019**, a o rezultatima konkursa ćete biti obaviješteni okvirno do 15. marta 2019. Nakon objavljivanja rezultata slijedi potpisivanje ugovora. Projektne aktivnosti moraju biti završene do 1. oktobra 2019.

Za prijavu na konkurs, potrebno je ispuniti [prijavni formular](#) i [formular za budžet](#). Prije popunjavanja ovih formulara, pročitajte detaljne instrukcije – [vodič](#).

Prijave (popunjen prijavni i formular za budžet), zajedno sa potrebnom pratećom dokumentacijom za Konkurs, treba poslati na adresu: recom.call@cgo-cce.org, sa predmetom **‘Prijedlog projekta u okviru poziva Aktivizam civilnog sektora za pomirenje u regionu bivše Jugoslavije – podrška REKOM-u EuropeAid/154870/DH/ACT/Multi’**. U slučaju nedoumica, dodatne informacije možete dobiti slanjem pitanja na recom.call@cgo-cce.org, najkasnije do **20. februara 2019**.

Ukupni budžet koji je opredijeljen za podršku projektima je 100 000 EUR, pri čemu je minimalni iznos po odobrenom projektu 3.000 EUR, a maksimalni 4.000 EUR.

Projekat *‘Aktivizam civilnog sektora za pomirenje u regionu bivše Jugoslavije – podrška REKOM-u’* sprovodi Fond za humanitarno pravo iz Srbije, Centar za građansko obrazovanje (CGO) iz Crne Gore, DOCUMENTA – Centar za suočavanje sa prošlošću i Inicijativa mladih za ljudska prava iz Hrvatske, Inicijativa mladih za ljudska prava iz Srbije, Fond za humanitarno pravo sa Kosova, Centar za demokratiju i tranzicionu pravdu iz Bosne i Hercegovine, Udruženje Tranzicijska pravda, odgovornost i sjećanje u Bosni i Hercegovini i Centar za istraživanja i kreiranje politika iz Makedonije.

[Koalicija za REKOM](#) zalaže se za osnivanje REKOM-a – *Regionalne komisije za utvrđivanje činjenica o ratnim zločinima i drugim teškim kršenjima ljudskih pravapočinjenih na prostoru bivše Jugoslavije od 1. januara 1991. godine do 31. decembra 2001. godine.*

Projekat Aktivizam civilnog sektora za pomirenje u regionu bivše Jugoslavije – podrška REKOM-upodržava Evropska Unija.

Poziv za podnošenje prijedloga projekata: Medijska i informacijska pismenost za organizacije civilnog društva u BiH

Fondacija za razvoj medija i civilnog društva „Mediacentar“ iz Sarajeva, upućuje poziv za podnošenje prijedloga projekata čiji je cilj izgradnja kapaciteta organizacija civilnog društva u Bosni i Hercegovini radi promoviranja praksi i politika medijske i informacijske pismenosti na lokalnom nivou.

Ovaj poziv za podnošenje prijedloga projekata je dio regionalnog projekta Mediji za građane – građani za medije, koji se uz podršku Evropske unije realizuje u Albaniji, Bosni i Hercegovini, Makedoniji, Crnoj Gori i Srbiji.

Poziv za podnošenje prijedloga projekata je otvoren za organizacije civilnog društva u Bosni i Hercegovini koje se bave programima za medije, obrazovanje, zagovaranje, javne kampanje i umjetnost ili razvojem digitalnih inovativnih projekata.

Podršku će dobiti dvije vrste projekata:

- LOT 1: Projekti unapređenja vještina medijske i informacijske pismenosti građana
- LOT 2: Kreativne inovacije – Projekti u oblasti umjetničke, medijske produkcije i produkcije u oblasti informacijskih tehnologija kojima se promoviraju inovacije i pristupačnost u obrazovanju iz medijske i informacijske pismenosti

Ukupan budžet za ovaj poziv za podnošenje prijedloga iznosi 20.000 eura, od čega 10.000 eura za svaki LOT. Budžet za pojedinačne projekte mora iznositi između 3.000 i 5.000 eura.

Trajanje predloženih projekata treba biti između 6 i 12 mjeseci. Aktivnosti mogu početi na dan potpisivanja ugovora i trebaju se završiti najkasnije do kraja maja 2020. godine.

Aplikacioni formulari:

1. [Vodič za aplikante](#)
2. [Aplikacijski formular – Opis projekta](#)
3. [Aplikacijski formular – Budžet](#)
4. [Izjava aplikanta](#)
5. [Izjava koaplikanta](#)

Sljedeći dokumenti su informativne prirode i ne trebaju se slati uz aplikaciju:

1. [Nacrt ugovora o podgrantu](#)
2. [Formular za narativni periodični izvještaj](#)
3. [Formular za narativni finalni izvještaj](#)

Pitanja o ovom pozivu za podnošenje projektnih prijedloga se mogu slati najkasnije do 18.2.2019. isključivo putem mejl adrese: MIL@media.ba.

Rok za podnošenje projektnog prijedloga je 28.2.2019. do 23:59h.

Aplikacije treba poslati elektronskim putem na sljedeću e-mail adresu: MIL@media.ba

Informativni sastanak o ovom pozivu za podnošenje prijedloga će biti održan 31.1.2019. u 12h u hotelu Courtyard by Marriott (Konferencijska sala Dean), Skenderija 1, Sarajevo. (media.ba)

Javni poziv za podnošenje prijedloga za dodjelu bespovratnih sredstava u svrhu podrške investicijama u saradnji sa dijasporom

Projekat *Dijaspora za razvoj* (D4D) objavljuje Javni poziv za podnošenje prijedloga projekata za dodjelu bespovratnih sredstava u svrhu podrške investicijama u saradnji s dijasporom.

D4D je projekat Vlade Švicarske i Ministarstva za ljudska prava i izbjeglice Bosne i Hercegovine (BiH), u partnerstvu s Razvojnim programom Ujedinjenih naroda (UNDP) i Međunarodnom organizacijom za migracije (IOM) u BiH. Osnovni cilj projekta je da doprinese poboljšanju socio-ekonomskih prilika i perspektiva za žene i muškarce u BiH, kao i unapređenju njihovog kvaliteta života kroz snažniju saradnju s dijasporom. Ovaj cilj će biti postignut kroz tri ključna rezultata:

1. Ministarstvo za ljudska prava i izbjeglice BiH i Ministarstvo vanjskih poslova BiH, u saradnji s institucijama vlasti na različitim razinama, koriste i dalje razvijaju svoje instrumente kako bi aktivno povezali, osigurali razmjenu i angažirali pripadnike i organizacije dijaspore.
2. Jedinice lokalne samouprave usklađuju svoje razvojne strategije sa strateškim opredjeljenjima viših nivoa vlasti po pitanju dijaspore, pružaju kvalitetnije usluge dijaspori, te potiču inicijative kojima se privlače znanje i investicije dijaspore u lokalnu zajednicu.
3. Partneri iz dijaspore prenose znanje i vještine te ostvaruju zajednička ulaganja s akterima iz privatnog sektora u BiH, doprinoseći stvaranju novih radnih mjesta.

U okviru rezultata 3, predviđena je podrška za uspostavu finansijskog mehanizma za područje Federacije Bosne i Hercegovine (FBiH) i Brčko distrikta (BD) BiH, a kojim bi se podržala realizacija investicija dijaspore i/ili u saradnji s dijasporom. U tom pravcu, uspostavljen je Investicijski fond kojim upravlja Razvojna banka FBiH (u daljem tekstu RB FBiH), u skladu s važećim propisima kojim se definira poslovanje RB FBiH.

Investicijski fond će osigurati bespovratna finansijska sredstva na otvoren i transparentan način, na osnovu jasno definiranih kriterija za odabir prijedloga investicijskih projekata u okviru ovog Javnog poziva. Sredstva za realizaciju ovog poziva osigurala je Vlada Švicarske.

Dokumenti:

[Javni poziv Investicijski fond FINAL](#)

[Prilog 1a Obrazac projektnog prijedloga IF FINAL](#)

[Prilog 2 Budzet projekta](#)

[Prilog 3 Pismo namjere sa istaknutim iznosom i definiranim izvorom sufinansiranja](#)

[Prilog 5 Izjava partnera iz dijaspore](#)

[Prilog 1b Plan aktivnosti i utroska sredstava](#)



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
**Omladinski resursni centar
Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba
hcatuzla@bih.net.ba**

*Mjesečni bilten uređuje
Omladinski resursni centar -
ORC Tuzla*

*Prevod Biltena na engleski: **Emir Karamujić***

*WEB stranica Mreže:
www.omladina-bih.net*

*Mejling lista Mreže:
posta@omladina-bih.net*

*Webmaster:
emir.delalic@gmail.com*